

# Paulus ele laulau parua aea ila pagid Tesalonika

---

**1** <sup>1</sup> Gau Paulus ga Sailas ga Timoti, gai abode laulau toa ne ga ila pagimi iaoa kelede ton Kristus ngan tuanga Tesalonika. Gimi alup toman ngan Deo Tamada ga Maron Iesus Kristus.

<sup>2</sup> Kemi ngan Deo Tamada ga Maron Iesus Kristus, gisirua led kadonga lolo marum aea ga lolo tarui aea idio pagimi.

## **Gid Tesalonika timadid matua ngan kadonga kulupulupu**

<sup>3</sup> Oaehoamai, gai manta aposa kemi ga ila pan Deo somisomi ngan gimi. Eine tutui ngan gai akado toa bedane, ngansa lemi kadonga lolo matua aea ilalala ga idae, be lemi kadonga kimnga aea pol ngan gimi ta ilalala ga idae pade. <sup>4</sup> Ngan ipu toaine, oangga gai ala pagid iaoa kelede ton Kristus ngan tuanga ga tuanga, gai apakuru ngan gimi somisomi. Be aninipu pagid ngan gimi amadid matua ngan gid kadonga kulupulupu toa iuotot ngan gimi ga panua tikakado ngan gimi. Be lolomi dung ga ienono ngan lemi kadonga lolo matua aea.

## **Posanga toa Deo irau ngan patutuinga ada posanga eine tutui**

<sup>5</sup> Danga toa ngada ne iuot ngan gimi, eine ipasolan mambe posanga toa Deo irau ngan patutuinga ami posanga eine tutui. Deo igera mambe gid kadonga kulupulupu toa oa iuotot ngan gimi ngansa gimi amamado ei ibageai. Ta ngan ipu toaine, Deo ikeo ga gimi eine panua kemikemi ngan badanga madonga kemi toa ei ibageai oa. <sup>6</sup> Ngansa Deo ei eaba tutui, ta ei ga ikoli mulian kadonga papaeamao toa gid panua tikakado ngan gimi. <sup>7</sup> Be ngan ami ieieinga, ei ga iaran gimi ga gai pade. Kadonga toa ne ga iuot tautaunga ngan ado toaiua Maron Iesus iuot masaeai ta

---

<sup>a</sup> 1.2 Ro 1.7   <sup>b</sup> 1.4 2Ko 7.4, 1Te 2.19   <sup>c</sup> 1.6 Ro 12.19   <sup>d</sup> 1.7 1Te 3.13

itnan bubur ga inam toman ngan dinga irarabal kapei ga ele anggelo toa urad kapepei. <sup>8</sup> Ei ga ipanas sapadua toa tilolon ngan Deo mao ga tinid ngan longonga ato kemi ton ada Maron Iesus Kristus mao. <sup>9</sup> Be Maron ga ipanas gid ga bedane: Gid ga tidio aluai ngan imata ga ele taranga kapei ga iura, ta tiduaea somisomi ga ilalala ga ila. <sup>10</sup> Kadonga toa ne ga iuot ngan ado toaiua Iesus inam, ta ele panua tututui ga tisoa ieda ga timatala ngan ei rabu ngan gid panua toa ngada oa lolod matua ngan ei. Be gimi pade ga adio rabu ngan gid, ngansa lolomi matua ngan Deo ele posanga toa gai apaola ga ila pagimi.

### Paulus masin tiraring ngan luanga gid Tesalonika

<sup>11</sup> Gai matamai nanan lolomi matua ngan ada Deo toa bedaoa, ta araring somisomi ngan ei iuato gimi panua kemikemi ngan nasinga gid kadonga toa ei ibaba gimi ngan. Be araring pade ngan iura kapei iparangrang gimi ngan gid kadonga kemikemi toa ienono lolomia, ga iparangrang gimi ngan saoa kadonga akakado ngan lemi kadonga lolo matua aea. <sup>12</sup> Toa bedaoa ta gimi ga asoa ada Maron Iesus ieda, be gimi edami ga idae pade ngan lemi lupnga toman ngan ei. Ta kadonga toa ne ga ipasolan mambe ada Deo ga Maron Iesus Kristus, gisirua lolod marum ngan gimi.

### Eaba toa ipul imur ngan Deo ele apu, eine ga iuot

**2** <sup>1</sup> Be oaeoamai, patautene gai abode posanga ila pagimi ngan ada Maron Iesus Kristus ele namanga ga led a lupnga pan. Be gai abeta matua gimi bedane: <sup>2</sup> Lolomi ede ga ede ga asamimi ngan posanga toaine padam. Panua edengada tipakaka ta tikeo ga Maron ele ado kapei toa oa iuot ga ila o. Ta panua tikeo ga gai abada Deo iaoa ta akeo toa bedaoa, be padengada tikeo ga gai apaola Deo ele posanga, mao abode posanga toa bedaoa ngan laulau, be eine mao. <sup>3</sup> Oangga eaba eta ipakaka gimi ngan posanga, mao ipakaka gimi ngan edap eta pade, irangrang ngan alongo ei mao. Ngansa ado toaiua irangrang ngan iuot sapae an mao. Mugaeai ngan, panua busa ga timan Deo aea isat, be eaba toa ipul imur ngan Deo ele apu ga iuot masaeai. Be muriai, eaba toa oa ga iduaea ngan dinga imperno. <sup>4</sup> Be saoa danga gid panua tiraring ga ila pan, mao tikeo ga iman ad deo, eine eaba toa oa ga iman aea isat ga isoa ieda mulian gadae ngan. Toa bedaoa ta ei ga idudunga Deo ele lumaeai ta idio imado ta ikeo pagid ipom matadeai bedane, “Gau kekelegau Deo.”

<sup>5</sup> Be ngan ado toaiua namamado toman ngan gimi, eine nakado gid posanga toa ne ga ila pagimi, be matami nanan mao? <sup>6</sup> Be labone gimi

<sup>e</sup> 1.8 Ais 66.15    <sup>f</sup> 1.9 Ais 2.10    <sup>g</sup> 1.10 Kol 3.4    <sup>h</sup> 1.11 Kol 1.9, 1Te 1.2-3    <sup>i</sup> 2.3 1Ti 4.1, 1Ilo 2.18, 4.3    <sup>j</sup> 2.4 Ese 28.2, Dan 11.36

aoatai ngan saoa danga ipakala eaba toa ne ngan ele namanga. Toa bedaoa ta ei ga iuot masaeai tutui ngan ele ado imata. <sup>7</sup>Ngansa labone Satan iura ibokoboko mumulnga, ta ikado ga panua tipul murid ngan Deo ele apu. Tautauंगा eaba toa ipul imur ngan Deo ele apu iuangga iuot masaeai, be labone eaba ede pade ipakala ele edap. Ta eaba toa ede pade ne ikakado maitne. Ei ga ipakala edap ngan eaba toa oa, ga kus ta kos mulian ga ila. <sup>8</sup><sup>k</sup>Tota eaba toa ipul imur ngan Deo ele apu ga iuot masaeai. Be muriai, oangga Maron Iesus per ga iuot, ei ga ipaeabu ngan eaba toa oa iura, be iuso iaoa uru ta ipamate eaba toa oa. <sup>9</sup><sup>l</sup>Be oangga eaba toa oa inam, ei ga iboko toman ngan Satan iura ta ipasolan gid uisinga pakakanga imata ede ga ede ta iman kilala, ta ipamatala gid panua. <sup>10</sup>Be ei ga ipakaka gid ngan kadonga papaeamao imata ede ga ede. Ta idada gid ga tilalala ngan edap paeamao ga irangrang ngan timukuru. Timukuru ngansa Deo ipasolan gid ngan posanga tautauंगा ngan badanga gid mulian, be tinid ngan posanga toa oa mao. <sup>11</sup>Ngan ipu toaine, Deo ga ilongean pakakanga ede toa iura kapei tau ipabuobuo gid, ta gid ga lolod matua ngan posanga pakakanga. <sup>12</sup>Toa bedaoa ta sapadua toa lolod matua ngan posanga tautauंगा mao, ga tinid igelgel ngan led kadonga sasat, eine Deo ga ipamadid gid ngan posanga ta ipanas gid.

### Manta tamadid matua ngan posanga tautauंगा

<sup>13</sup><sup>m</sup>Be oaeoemai, Deo ikim gimi kapei tau, ta gai somisomi manta aposa kemi ga ila pan ngan gimi, ngansa mugaeai ngan danga toa ngada ne led otnga, Deo isio gimi ngan ibada gimi mulian. Gimi lolomi matua ngan posanga tautauंगा, ta ei ga ibada gimi mulian ngan Itautau Tutui iura ta idol ele ul ngan gimi. <sup>14</sup>Be ngan ato kemi toa gai apaola ga ila pagimi, ei ibaba gimi ngansa iuangga ibada gimi ta ala amado ngan ada Maron Iesus Kristus ele taranga. <sup>15</sup>Tota oaeoemai, manta amadid matua ga akisi gid nasinga toa gai apaotai pagimi ngan aoamai ga lemai laulau pade.

<sup>16</sup>Be ada Maron Iesus Kristus ga Deo Tamada, gisirua tikim gita kapei tau. Be lolod marum ngan gita ta tipamatua loloda somisomi ga ilalala ga ila. Deo ilua gita ta taoatai kemi mambe ei ga ibada madonga kemi pagita ta tasangasanga ei. <sup>17</sup>Be gai araring ngan ei ipamatua lolomi ga ilua gimi ta amadid matua ngan kadonga kemikemi ga posanga kemikemi toa ngada ne.

### Manta araring ngan luanga gai

**3** <sup>1</sup>Oaeoemai, gai lemai posanga keleda pade ga bedane: Manta araring ngan luanga gai ta Maron ele ato irangrang ngan iuasasa manmanae,

<sup>k</sup> 2.8 Ais 11.4, PM 19.15    <sup>l</sup> 2.9 PM 13.11-13    <sup>m</sup> 2.13 Ep 1.4, 2Te 1.3

ga panua tilolon ngan ato toa ne lalaede mambe gimi alolon ngan. <sup>2</sup>Ga pade, araring ngan Deo ibada gai mulian pagid panua papaeamao bagedeai, ngansa panua busa lolod matua ngan Iesus mao. <sup>3</sup>Be Maron ei eaba mata tutui aea, ta ei ga ipamatua gimi ga imata kikisi gimi, ta irangrang ngan eaba paeamao ipaeabu ngan gimi mao. <sup>4</sup>Be Maron ikado ga gai aoatai kemi mambe labone ga muriai pade, gimi ga anasnasi saoa posanga gai arenren pagimi ngan. <sup>5</sup>Be gai araring ngan Maron ipasolan gimi ta aoatai kemi mambe Deo ikim gimi kapei tau, ta ilualua gimi ga amadid matua ngan kadonga kulupulupu, lalaede mambe Kristus.

### Panua toa ngada ne manta tiboko

<sup>6</sup>Be oaeoemai, ngan ada Maron Iesus Kristus ieda, gai aposa matua pagimi bedane: Oangga oaeoemi etangada timalai alele ga tinasnasi gid nasinga toa gai apasolan gimi ngan oa mao, manta ala aluai ngan gid. <sup>7</sup>Ngansa gimi aoatai mambe somisomi manta anasnasi kadonga lalaede mambe gai akakado. Be matami nanan: Ngan ado toaiua gai amamado toman ngan gimi, gai amamado sapaeanao mao, be akakado naurata. <sup>8</sup>Ga pade, gai aean eaba eta ele annga sapaeanao mao. Gai aolol. Be gai aboko matua bong ga ado, ta akakado naurata kulupulupu, ngansa tinimai ngan apaeaea eaba eta ngan gimi mao. <sup>9</sup>Tautaunga, edamai kapei ta arangrang ngan abada luanga inam pagimi, be gai akado bedaoa mao ngansa gai aoangga apasolan gimi ngan kadonga kemikemi gimi manta anasnasi. <sup>10</sup>Ngansa gai amamado toman ngan gimi maitne, be akado posanga matua pagimi bedane: Oangga eaba sai iboko mao, irangrang ngan apan eaba toa oa aea annga mao.

<sup>11</sup>Be gai alongo posanga mambe panua edengada toa tilalala rabu ngan gimi, gid malainga ad. Tiboko mao, be tipatoi gid sapaeanao ga tidudunga ngan panua padengada led posanga. <sup>12</sup>Ngan Maron Iesus Kristus ieda, gai aposa matua pagid panua toa bedaoa: Gid manta mumun ga tibokoboko ngan ad annga aea olnga. <sup>13</sup>Be oaeoemai, gid kadonga kemikemi, irangrang ngan atolatola ngan aea nasinga mao.

<sup>14</sup>Be oangga sai inasi lemari posanga ngan laulau toa ne mao, manta matami nanan ei eaba sai toa ta ala aluai ngan ei. Toa bedaoa ta ei ga maeamae ei. <sup>15</sup>Be irangrang ngan agera ei mambe ami isat mao, be apabib ele mambe ei ami kakau.

### Paulus ele ado kemi ila pagid

<sup>16</sup>Be gau nararing ga ila pan Maron, eaba toa lolo tarui aea, ngan ei ikado ga lolomi itarui somisomi ngan danga toa ngada ne. Be Maron idio pagimi toa ngada na.

<sup>n</sup> 3.4 2Ko 7.16, Gal 5.10   <sup>o</sup> 3.6 Ro 16.17   <sup>p</sup> 3.7 Plp 3.17   <sup>q</sup> 3.8 1Te 2.9   <sup>r</sup> 3.9 1Ko 9.4, 1Te 1.6   <sup>s</sup> 3.11 1Ti 5.13   <sup>t</sup> 3.12 1Te 4.11   <sup>u</sup> 3.13 Gal 6.9   <sup>v</sup> 3.15 1Te 5.14

<sup>17</sup>Gau Paulus, ngan bageg nabode leg ado kemi toa ne ila pagimi. Eine leg kilala toa nabode ngan leg laulau toa ngada ne. Leg bodenga tota bedane.

<sup>18</sup>Kemi ngan ada Maron Iesus Kristus ele kadonga lolo marum aea idio pagimi toa ngada na.